

四庫全書

集部

欽定四庫全書

集部
紫微集卷九至
十二

詳校官庶吉士臣瑚圖禮

主事臣呂雲棟覆勘

欽定四庫全書

紫微集卷九

宋 張嶠 撰

七言絕句

乘舟阻風

平生所遇悉堪哈
往返江湖知幾回
長是扁舟阻風浪
羨他舟楫掛帆來

送陳忠玉兼寄尹夢得黃仲通并寄李通姪

當時分袂各丁年
南國相逢鬢已班
羨子還來覲丘隴

益令歸夢繞金山

少年渾欲不勝衣
豐下如今帶十圍
他日飛揚未輕料
卜居終欲近郊扉

百年門戶已蕭然
每喜人傳小阮賢
好遣僕童種榆枿
老夫行欲賦歸田

南川解袂十年餘
環堵蕭然頗自娛
生計荒餘莫深恨
歸來猶得在枌榆

君歸多問尹夫子
病後新詩定益工
鴻雁南來書不到

想應全未廢書空

龍洞

瀑溜落巖水柱碎迸珠跳沫似飛埃西風更與遊人便
時送輕塵灑面來

巖樹交柯如有意欲將密葉蔽溪門紫府沿源應不遠
未知相去幾程雲

過鄖鄉寒食日

蒼茫雲樹渺相迎山縣燒餘祗故城雞犬不聞仍禁火

經過轉見亂離情

夢中作後兩句前句覺後足成皆夢中所見也
山南山北是人家紅杏香中日未斜傳語春風能幾日
慎無吹折最高花

閏月二日始開北牕籬門

夏郊群樹綠冥冥北戶今朝又脫扃極目不知何所詣
三年於此看縈青

掌口寺寮聞杜鵑

青林雨濕煙濛濛
杜鵑含冤號晚風
雨轉蕭蕭聲轉急
不堪聞在亂離中

山中月夜聞杜鵑憶鹿門舊遊

陰陰綠柳子規啼
風送餘聲夜轉悲
山月籠明蘭氣馥
恍然如在鹿門時

暮春道中聞蟬

西山日落東山明
長風吹花客心驚
房州氣候不可解
嫩葉暗中蟬亂鳴

夜雨有作

睡足秋堂夜雨聲
天涯此夕歎飄零
空階滴瀝腸堪斷
更向芭蕉葉上聽

仇氏園

修竹青冥山翠合
圓荷枯倒水禽飛
造門休問林塘主
暫借閒窗負暖暉

過覃氏園偶題

十日濃陰飛細雨
清川初漲水平沙
幽人閉戶春已半

開遍山南山北花

思故園

柳外高風盡日吹
春來不省見花枝
漢傍別墅三株杏
記得飄零似雪時

十二月旦雪霰大摯

憶昔尋梅漢水傍
故乘微霰渡澄江
如今飄泊閩山側
擁褐安禪聽打窗

七月二日大風作一晝夜方止土人云此風潮

信也

風不終朝聞老氏撼山今既一期

自旦至旦為期

餘得非造化

誇能事要使人無盡信書

後世新奇方競出難持古語對時云欲將老氏飄風語

刊剟還同火浣文

魏文帝作皇覽著無火浣布至明帝時貢至刊去此節

風潮初見土人云

海風每作大則三日稍小則四日土人謂之風潮五六年一作始愧

鰕生泥昔言却以所經疑柱史著書應祇為中原

詠鶴

引吭清噉達天外何意留連
養恩我亦久懷區外志
終當乘此虹天門

非干位置異雞群自是昂藏絕
世紛若使風標公子見
亦應慙恨不如君

當年君子成猿鶴物化誰能不
愴神奮翼一歸霄漢後
安知不作艾封人

心期附鳳參雲駕豈與凡禽共
苑園黃鵠無能猶自免
應緣遠去不乘軒

千年一度復來歸城郭何人識
令威當日榮華竟誰是
祇應皆作路塵飛

孤山

日薄城煙湖面紅
勝遊常恨隔崇墉
不如縱櫂絕湖去
却聽孤山打暮鐘

贈何子應侍兒

去非有詩贈
何兼及侍兒

何郎當日在房州
曾見梅花倚郡樓
賦罷凌風人已朽
後來白盡幾人頭

憶見紅茵起襪塵十年相遇淞河津
慙慙怪我凋雙鬢不似花枝卻耐春

山中校書時有田父攜酒見訪

讎書不必天祿閣林下巾箱且自攜
時有田翁來暱飲嗟無太乙照青藜

魏塘荒僻春來無雜花一枝可慰逐客
二月二十六日見籬外桃花盛開如
爍紅霞因為絕句一首

狂風幾日漲黃塵
籬外桃花忽照人
不有繁紅慰逐客
二年不識淞江春

凌雲見桃花

曠却相隨不相識
主翁翻作白頭新
桃花未見不曾失
拈出還成埋没人

二月二十四日至魏塘

桃花零落怨春回
松下朱門向水開
燕子不知非舊客
依然還取故巢來

茫茫白水環虛市股引清渠繞梵宮一夜春風入高柳
恍如身在海濤中

青葉生林啼鳥新出門逢水不逢人楊花滿地披重甕
不信人間有暮春

雨罷青枝猶裊裊風餘紫燕故翩翩垂簾竟日無餘事
庭草雖長不用鞭

病起清羸廢酒卮茶煙聊復颺輕颺卜居便作千年計
曾見蟠桃著子時

一行疎柳對柴門又見荒煙上晚村日日牆陰觀日影
人生消得幾黃昏

今朝自撒窗前柵決皆雙鳬沒綺塍便是提封無限界
不憂閭陌誤東陵

法界頌二首

木人睡足理精神大地山河勿一塵不是解談無口論
由來不及世間人

山河大地因誰有聞見覺知非我親不挂一絲全體露

真成本分住山人

自房州歸掌口聞杜鵑時杜鵑花盛開

亂中一任青春去祇有閒愁作鬢華
日暮風吹古原樹
杜鵑啼遍滿林花

澗邊

喬林近水葉陰陰
縈石溪流自淺深
隔水羣山森夏木
白雲樓起媚遙岑

夜坐

地爐火煖壁燈青
虛閣風驚鐸亂鳴
門掩上方山月黑
北窗危坐聽松聲

晚步

晚來聊復岸烏紗
指點園林已罷花
高柳交陰斜日照
閒攜兒稚看棲鴉

崇山圖七賢詩

短壑長松經始餘
次山無往不從吾
便應掃盡陳蹤蹟
摹作三溪少隱圖

峴首登臨事已非風流千古載豐碑
鑿空尋出崇山景又作襄陽一段奇

居士胸中有丘壑買山占得水雲寬
七峰環合三溪碧盡付騷人一倚欄

負郭幽崖面武當襄江前占水雲長
四時景趣無窮盡俱向公家靜隱堂

兩山列影作眉愁盡付襄江一鑑收
問訊風光應更好賦詩誰與共清流

山容渾似關南見水曲初疑峴首看
聞說新堂多勝槩
待飛一葉上雲端

內人斜

當日承恩向壁門
今同傖鬼落荒村
丘墳埋沒生秋草
人事如斯詎可論

山色依依水自流
內人斜畔最堪愁
荒榛蔓草縈寒骨
更有何人弔杜秋

晚望西崖

西崖佳樹綠層層
日落山煙滿樹生
蕭然倚杖疎籬外
遙聽幽泉斷續鳴

登石門山山側有觀基在荒筠中不可到山相
對即新安縣也今謂之新安平

嶺樹疎疎秋景明
荒筠埋沒觀基平
石門山下微江水
依舊東流日夜聲

石門山對新安縣
基址平來蔓草秋
千尺微江清見底
悲鳴還向縣前流

梅

一枝寒艷映窗光
藥氣侵衣斷客腸
漢上水邊千萬樹
春來何地着清香

偶成梅詠

開時都不值繁華
結實調羹尚有誇
若語當年上春事
總輸凡木後開花

故園微路遶江干
常記開時偈歲寒
萬里臨風驚老眼
却疑還是霧中看

霧態風姿紫府仙直疑清夜降羊權不知老大心灰久
香氣撩人似昔年

覽鏡

覽鏡知予骨相屯便當終與老農隣議將此地為菟圃
種藥栽花二十春

興州看月上

城下滄波去不停城頭吹角作邊聲去年此夜深閨月
今向興州山上明

溪傍梅花初開

細挹幽香辨殘雪却驚寒谷獨先春
慙慙為記春風面他日重來是故人

溪流一派碧潺潺落蕊隨溪出亂山
惟有劉郎重回首往來行客更誰攀

冒雪早行

每憶西山千丈秀雲霾對面失空青
千林夜雪無人跡獨策羸驂帶曉星

秋晚遊謙上人菴四首

嶷嶷羣峰當戶立
泠泠絕澗出山長
虛寮竟日無餘事
默坐時聞柏子香

兩岸喬松上冷煙
誅茅遠在亂峯前
居人不識新菴路
欲入山門尋細泉

霜落秋山楓樹紅
茅簷直面列諸峯
上人竟日觀心坐
粥飯遙憑別寺鐘

溪流觸石轉輕雷
境靜身閒萬慮灰
西崦遠寺青煙外

時聽鐘聲度壑來

寒食日兒輩遊尼菴戲作

雜英滿樹春欲過修竹參雲萬餘箇
頭陀雲頂出迎賓
恐是當時劉鐵磨

讀太平廣記三首

禁苑茫茫盡日吹桃紅李白祇青枝
唯餘阿醋偏驕妬

不畏封家十八姨

漢趙昭儀
姊妹驕妬

月下來過徵士門
可憐桃李盡能言
其如苦畏春風暴

可為牆東植絳幃

夢裏空驚歲月長覺時追憶始堪傷
十年烜赫南柯守竟日歡娛審雨堂

早發竹山

天外峯巒排木杪江邊石氣動雲根
憑誰為謝東流水好送寒聲入故園

去水湯湯縈嶼轉前山恰恰與雲平
僕夫應怪微吟苦寧識江頭送目情

竹山道中

青山忽斷開平陸
雞犬人煙太古風
野老誅茅寧有意
一生身在翠微中

再到竹山

衰草連雲鴉亂飛
荒城寂歷澹寒曦
屋廬燒盡民居少
祇有青山似昔時

老罷

滿谷千千萬萬紅
含情一一待春風
難將朽質爭娟好

拚却輪囷似老松

癸亥春

荒村渺渺不知春
三見籬邊物態新
漸習魚蝦解蠻語
自疑元是魏塘人

春詞

莽莽暄風吹九州
春來何處不消憂
林間鳥語隨時好
花裏風光映日流

無復餘聲到耳邊
衡門不閉亦蕭然
風枝鳥語皆無賴

每向春晴聒晝眠

春間作

桃花遠近火成堆誰遣黃昏動地來
與使便成零落去何如前日未吹開

有感二首

題卷安西嗟妙蹟翩翩遙想翦龍鸞
那知偶落黠奴手只作葡萄一斗看

庾翼神明還舊觀叢山草樹見揮毫
如今祇作葡萄用

惆悵遭離老虜曹

老虜曹
漢書語

雨後愴然有感

騰騰醉裏十年事
睽睽窗前半夜燈
老去自堪愁作伴
雨聲何用更憑陵

贈南回了豐上人三首

徧參初自浙江回
梵刹金鋪始與開
袖手却來巖下住
蕭然一逕長莓苔

連階澹澹方池水
擁檻煌煌百日花
遙想老豐秋雨夜

跣趺獨坐聽鳴蛙

雙頰朱丹雪染眉終朝一飯便無為庭前柏是初年種
今見森森合抱時

張文潛作淮陰侯詩有平生蕭相真知己何事
還同女子謀句因為蕭相代答一首

當日追亡如不及豈於今日故相圖身如累卵君知否
方買民田欲自汙

贈僧

片雲一去幾時迴好在江心碧玉堆
他時倘記珍台客默坐猶能遣化來

寄漢上禪者

睡起題詩寄漢濱幾年音信斷知聞
何人為我持瓶去滿貯虛曇一餉君

寄謙上人

屋裏迷家張處士上門指路上人謙
如今線索都齊露拍手呵呵未是忺

登胥山贈長老淨曇二首

白水環村漫漫流
天邊浮綠遠眉修
春晴一試登山屐
愧乏新詩與惠休

詩律遙追璨可流
安禪總不礙聞修
勸君著意搜新句
准擬他年有惠休

法界頌

自從仍得無邊界
宇宙方知狹陋生
時節短于羊脚熟
廣輪才似一牛鳴

呈湖州趙再可舍人二首

五雲螭陛舊仙翁，來往琉璃一色宮。
未到行人已能說，使君清與雪溪同。

一舸乘風汎渺茫，來依芳杜雪鷗行。
難將野服隨賓履，七字聊參燕寢香。

晚秋風雨

滿目蕭蕭雲氣流，芭蕉梧葉共飈颼。
松門盡日無來客，獨與疎篁傲晚秋。

欽定四庫全書

紫微集
卷九

七月二十日忽有青蠅翔舞坐隅揮之不去

每見營營止樊棘不應遺矢未央宮恐報符堅筆端事
自疑今在洒心中

趙表之送梅并詩次韻

綠蓓繁時春欲暗曉霜濃處信初來今朝消息南枝露
知是微陽九地回

不著名身與句身迥然超過亦無真誰知終日騰騰者
便是當來本分人

都緣老罷無筋力不是萌心有愛憎
他時聊作逢場戲分謗圖知我亦曾

未忘一笑杯盤樂終愛忘言氣味長
多慚居士梅花供舉世何人解識香

再次前韻

曩日不緣逃暑至今朝端為探春來
梅花落去香渝烈去去還應首重廻

若認諸空猶是妄莫言衆有便非真
今朝試遣木居士

問取頭陀菴裏人

齊國饋時堪出走東山攜處未生憎道人莫謂全無念
行樂須知此日曾

亂蕊晚迎晴日暗疎枝迥映暮山長蕭然一榻安禪夜
細雨輕風為發香

野泉泱泱貫城來紅紫商量次第開尚想梅橫却月觀
遙知雲雨暗陽臺

晴空杳杳冥鴻遠阿閣沉沉社燕回酬酢風光堪一醉

却虞蜂蝶浪相猜

登樓對雪

冰花不省如斯暴疑是吹沙打夜窗
莫遣沉陰增敵氣且將盈尺作農祥

朔風幾夜相回薄世路祇今多苦辛
擒寇可無懸瓠將泛舟未許剡溪人

遊獨孤城

微王舊國雲煙古獨氏空城睥睨平
故物祇應惟石瀨

昔人曾此聽寒聲

登真觀遺履池

古柏參天鶴不歸
空餘池水澹清暉
當時遺舄今安在
應作雙鳬過水飛

雙楠送何致遠歸陝西

亂後生涯似轉蓬
何堪送客值秋風
含悽試看東歸路
只見青山繞漢中

日落邊城旌旆愁
漢家鐵馬正防秋
慙慙送子西征路

努力班超萬里侯

種松

壽張種漆將為器
假用終能及里閭
我植青松期偃蓋
蒼然相對雪霜餘

紛紛羣木望秋零
獨喜新松五鬣音
他年城郭人非舊
我始攜鋤斲茯苓

贈翁法師

松水為資萬事輕
蕭然一室寄餘生
勞君回去來相過

可見高人世外情

病餘蒲柳懼先秋妄想仙人十二樓好住名山煮白石

他年因子問丹丘

松水事見北史徐則傳煮白石晉鮑靚事

心老得法天柱修靜能道黃龍會中諸耆舊及

他宗派知名士辛酉秋應供茲院刻意行道訖

無應者明年夏末一日棄去將適焦山圖巖以

棲老焉丐余詩以行為作三絕句

經年于此忍朝飢又見秋山草木腓滿口陽春無和者

却將錫杖向空飛

道人別我焦山去
擬卜穹巖畢暮年
帆來帆去澄江濶
我亦心馳落照前

口如布穀本無語
身似虛空何所還
觀音巖迤出雲雨

好住幽窗望小山

心本淮南人

贈羽人

迢然誰識坐忘心
擁褐無言閉息深
庭竹自搖人語寂
終朝相對祇胎禽

清晨叩齒誦黃庭絳闕珠宮會衆靈齋罷藥爐深炷火
戲攀庭樹作熊經

芍藥

時人惟解愛芳菲服媚香濃竟莫知幽卧獨憐芳氣馥
世間惟有柳州詩

淒淒寒雨送餘春繁艷濃香慰病身忽作暖風遲日想
慨然如在漢江濱

典刑雖有但傷心芳氣時來尚滿襟還似夏侯家衆妓

隔簾聊聽繞梁音

淺白輕黃皆異態還如妬寵各低垂暖風一陣塗香烈
午酒醺酣嗅蕊時

芳氣時時侵鼻觀令人三復柳州詩非因寂寞耽幽意
醉倒花間未必知

暮春山中

經時避地隱蒼巖世慮忘來萬事堪日暮獨行南澗側
遙依疎樹望晴嵐

絕句

日炙櫻桃已半紅
更薰花氣滿襟風
路傍謁舍蹲遺獸
應有荒墳在夢中

欽定四庫全書

紫微集卷十

宋 張嶠 撰

七言絕句

墨梅四首

生憎丹粉累幽姿
故着輕煤寫瘦枝
還似故園江上影
半籠煙月在疎籬

南枝昨夜雪初乾
瘦質臨風亂藥繁
憶向溪橋曾駐馬
却疑渾是霧中看

化工着意作幽花疑是來從阿母家寂寞沙村煙雨裏
如看竹外一枝斜

山邊幽路水邊村曾被疎花斷客魂猶恨東風無意思
更吹煙雨暗黃昏

題鮮于蹈夫墨梅二絕句

黃簾綠幕護輕寒猶憶當年叩畫欄紅燭淚殘人語寂
玉人曾隔綺牕看

不御鉛華着素衣玉奴風調似清姿何郎不作凌風句

幻出江南煙雨時

金道鋪庭下竹十許枝因憶柳子厚清水驛絕

句

庭下幽篁十數枝令人偏記柳州詩襄陽耆舊消除盡
清水驛傍應斷碑

題竹

山礪聲確霧冥冥瘦筍初從石罅生開圖細想經過地
記得南山步晚晴

秋霽日暖飛蟲蔽空甲子秋作

秋霽無風日自曛飛蟲偪塞似屯雲老夫漂蕩居夷久
祇恐乘空是廩君

贈筆工

顧兒霜餘毫健如鈗錐妙手應時胥臨池自愧無功用

欲借僧房柿葉書

楊雄賦以為儲胥注謂儲
物以待則知古須胥通用

夜聽雨聲

溟溟雨意若絲棼銀竹森森瀉夜雲憶昔曾行兩京道

還如孤驛枕邊聞

喜劉寶學彥修得歸因敘初別時悽愴之意

病起回思欲去時
菟裘重到倍依依
青苔一徑空行迹
門掩殘陽翠碧飛

三泉退敵捐軀日
五嶺逢紛去國年
皇天自古扶忠義
不必臨風畏跼鳶

書來不苦瘴侵肌
却恐孤生厭食薇
春到自然羣物遂
須知寒谷獨增輝

聊城欲下樂生去宣室釐成賈傅歸來往炎荒六千里
歸來却得及春菲

滴水津頭逢早春桂林楊柳拂行塵西園無限芳菲樹
皆作新花詩主人

曾向花間醉玉卮今年花發去年枝君恩不賜泥封詔
春物翻成滿地悲

幾年竭節在顏行去國誰憐道路長自是君心知魏尚
不應微諫待馮唐

去時弔古愚溪上歸日讀碑浯水邊不似柳州終抱憤
應同郭令欲扶顛

林邑回觀山靄微短亭楊柳弄晴暉遙憐一騎登途日
逐客人人淚滿衣

衡嶽峯高刮眼明行看渾異去時情斜陽託宿沅江上
反聽哀猿是好聲

髀肉生

歸計無成須絕望幽居有意漫經營自憐心異劉玄德

更喜年來髀肉生

建炎庚戌潰兵犯襄漢寒食阻趨光化拜掃追
慕痛哭因成二詩

上庸寒食已無花山木青青吐嫩芽此日傷心九原路
想無雞犬祇鳴鴉

故園墳樹想青葱寒食風光淚眼中自痛不如傖父子
紙錢猶掛樹頭風

寶林晚坐

寂歷空堦惟落葉黃昏古寺只棲鴟高僧相對共無語
坐看西林消暝霞

金州行衙

寥寥空館風號木浩浩長雲雪過窻故國幾重輕靄外
歸心一夜滿寒江

灘聲吹浪城邊壯寒漏鏘金枕畔搖庭樹不隨羣木落
霜風著葉夜蕭蕭

齒痛冀其速落而不可得

慈子為牛真自取逢分卧簣亦何哉我今病落無多恨

沉復終同短髮埋

未埋髮齒
漢人語

讀楚世家

喪歸荆楚痛遺民脩好行人繼入秦不待金僊來震旦
君王已解等冤親

題興元雙楠

興元雙幹名千里字水孤根壓九垓豈但為君丈人行
諦觀直恐是雲來

晚晴

繁香苦愛飄歧路風雨何須送晚春坐久綺霞明落照
屏雷亦解慰遊人

飲水

玉池漱液自芳鮮記得當初病渴年杼井只應供爨用
不須全是鳳門泉

即事

履齒休令破紫苔柴門無客不須開雨餘籬菊埋光去

木落前山獻體來

劉少師妻獻園宅為景靈宮基

中興禮物事彌惇
獻宅那知故事存
當日司徒功業就
舊居亦作奉誠園

漢家原廟殿雄規
欲及櫻桃果獻時
豈為夫人能體國
將軍本不以家為

雞

馴養經年聊伺曉
不須風雨遲明呼
年來頗學方仙道

拔宅他時從我無

題曾口縣江月亭

庾亮樓前唯皎月
屈原祠下祇滄波
北人每到猶腸斷
江月涵輝更若何

江城月暗山岑鬱
默坐但聽巴水聲
向使江清山月白
欲教遷客苦為情

聞荒雞

但可推顏悲失旦
不應風雨誤司晨
書生久已垂華髮

豈是當年起舞人

題趙表之李伯時畫捉馬圖詩二首

中原無事不粟馬散牧春臯薦草中何必西來三萬里
龍媒二駿是追風

徒觀出塞十四萬詎覺權奇冀北空不用執驅名校尉
但令苜蓿遍離宮

春陰

陰靄連朝昏廣野鮮飊終日漾書帷可憐細雨輕寒夜

正是故園花發時

臨桂令以薦當趨朝置酒召客戲作二十八字
遣六從事蒞之壽其太夫人

雙鳧舊作朝天計一鶚新收薦士書不惜持盃相暖熱
白頭慈母最憐渠

讀退之集偶書

宰書三上已間闕見辱功官又大難當日之人定誰子
竟無名字在人間

閔雨

映空終日但如絲安得垂簷似綆縻須作深秋霖雨想
要無遺恨欲晴時

丙寅三月憫雨既雨患未足

別墅相望漢水傍少年不省問豐荒那知五十叨為郡
日為邦人慮雨暘

冒小雨晚出

霜稻收餘隴畝空雨容和霧晚溟濛出門忽見丹青樹

腸斷家山柿葉紅

觀洛神圖慨然有作

天邊崧少遠微茫猶想霓旌駐水旁
逸態瑰姿何處在尚應遺恨寄君王

慙慙遵渚餽明璫情托微波事渺茫
油壁却歸天上去沙晴空見水禽翔

輾轅伊闕兩相望草樹離離自鬱蒼
舊物祇餘金帶枕夜闌空斷九回腸

石竹

石竹為花品最微當時曾入謫仙詩
新葩競發迷形似
紫蝶翩翩綴碧枝

勸農

出郭循溪路向東
隼旟悠颺滿春風
峰巒沐霧尚陰澹
桃李出牆能白紅

皇恩力本勸農耕
老稚爭隨刺史行
楊柳垂村麴塵色
殊鄉時節近清明

春泥滑滑不須愁
勉事深耕定有秋
沓障東南知更好
歸來頻上郡城樓

春到逢花猶眼亂
老來對酒便心降
須知渴肺難禁醉
鴨綠潾潾酌玉缸

鳥聲撩亂喜春晴
詩思知隨筆下生
桃李連村向零落
出牆猶有數花明

天桃無力卧溪沙
楊柳陰陰勝士家
下馬欲知留客意
棠梨故作後開花

讀趙飛燕外傳雜詩

漫漫積雪被岡坻
宜主當時有暗期
忽見梅花照夜發
祇疑猶待射雕兒

九回沉水新為髻
故繡裙襦穩稱身
禍水歟來漂燎火
知幾唯有淖夫人

魏宮悵望楊花去
漢掖齊歌赤鳳來
淫蠱到頭成底事
荒田野草但堪哀

漢武餘威信未窮
單于來見未央宮
如何運偶鴻嘉主

樊嫵宮中作女戎

燕燕承恩住遠條
初能順息度寒宵
如何不以斯術進
却使甘心慎恤膠

赤鳳謾言最可傷
君王不謂有他腸
併疑池上將仙去
祇恐留連為侍郎

合德來嬪帝甚歡
溫柔鄉裏勝求仙
武皇雖被白雲誤
猶得垂衣到暮年

夜坐讀離騷

山風颯颯木蕭蕭挑盡青燈夜正遙但得誅茅臨澗水
長年飲酒詠離騷

春餘

春餘白髮日蕭蕭無復當年湖海豪為吏應須長孫子
裁詩要及九牛腰

春晚偶書

山中處處罷芳菲衆綠成陰繞碧溪薄暮鳥棲雲氣惡
滿林風雨杜鵑啼

五月二十四日宿永睦將口香積院僧軒東望
甚遠滿山皆松檜聲

遠投僧舍青煙畔夾路松音鐘磬幽試倚危軒望鄉邑
三巴日暮遠峯稠

煙嵐雲樹兩微茫遷客西來正望鄉若值秋風小搖落
祇應無奈九回腸

峯巒綿亘幾千里半霽半陰輕靄中僧房借榻睡初足
滿谷笙篁松檜風

金山回道中

光化封內

陽陽春物已離披豺虎縱橫萬事違沉痛新阡一來省

却隨江燕又西飛

古詩云東飛百勞西飛燕

疾風伯

不雨經時氣若焚共欣疎點夜深聞平明忽捲重陰盡
可是風師待策勲

題竹

細葉蕭蕭擁瘦枝石間新筍迸根遲輕筠為使兒童護

待看娟娟解籜時

題石井

天孫洗黛作靈泉山腹空明一鏡圓
不用奔流出山去人間濁浪正浮天

嗟余是客仍為客歎爾真山似假山
當日訪珪能玉沒端由生不近長安

秋晴

時事任從兒輩說新詩誰得老夫降
鬼名罷檢秋堂靜

卧看風枝動晚牕

二月五日晚閒步於庭日且下有青雲如遠山
狀望之不厭作絕句以遣興

亂後有誰三徑足日長如我幾人間夕陽盡處春容好
更賴青雲作遠山

取蘭梅置几上

蘭茁梅枝兩竝奇高標真不負深知風輕雨細春寒夜
正是清香發越時

淺綠深藏垂翠葆嬌紅巧傳刻繒花南遊只在元樓客

坐入合香居士家

合香居士
見華嚴經

崇蘭梅蘂竝時芳更得春風為發揚還似高人有常德
年年只作舊時香

讀崔昭緯傳

季末惱憂事可嗟本根已撥尚肥家那堪事異荀文若
空費君王十四車

峽中晚春

臨水桃花已亂飛
向人渾似訴離披
漠漠細雨春風暴
還是青林生葉時

出微王峽讀子厚詩恍然偶作二絕句

西來一水古今綠
峽裏諸山天下奇
非是愚溪溪上客
未應輕作此山詩

驚湍絕壁窮天險
山水如斯世莫知
林邑峯巒瘴江水
發揮須待柳州詩

雨後

一雨稻畦春水足苦遭鳴蛭故相喧不妨信馬東城路
行看林花落古原

登舟雨作再作一絕

平生過眼無窮景未省經行有此奇煙雨連山催去棹
不容青壁更題詩

憤雨

莽莽屯雲接四溟直疑天漏地維傾此生覬望盡灰冷
但願耳邊無雨聲

欲雨

案上文書任作堆病無心力更翻開前陂萬頃平如砥
掛上西牕看雨來

雨中聽鄰家侍兒歌

客恨如醒何日醒滿空煙雨晝冥冥垂簾竟日無餘事
隔葉流鶯獨坐聽

辛酉二月十六日出暗門循城如北關登舟

春水悠悠繞廢臺竹與幽軋轉城隈路人不解知逐客

謂是尋春湖上來

城國排雲鎖病身豈知城外物華新
非緣放逐循牆去
不見西湖萬頃春

舟中贈鮮于孝叔

六年相見倍相親欲話離憂恐愴神
莫惜維舟連夜語
三巴雅舊更無人

渡湘水

悠悠寒日傍城闌風颭微波作細鱗
莫怪此江清見底

屈平曾向此投身

麻子山

雲煙出沒葛蔓嶺蜀錦開張楓樹林連天寒雨何時斷
一室空山黃葉深

漫山麥壠已青青雲壓羣峯未肯晴泥行若畏荒蹊險
悞聽風聲作雨聲

永康山

嵯峨千仞永康山石路終朝轉屈盤政恐乘高傷遠目

忽然煙霧鎖峯巒

自禮賢還鵝湖望山頂飛流有作

農夫秧稻滿畦水行客跨驢無樹陂
熱風吹面日方午忽見綠巖冰柱垂

夾日赤雲方變火行人渴肺欲生塵
飛流百丈垂虹冷愧爾山中宴坐人

言微水

水畔平沙如積雪灘心狠石似羣牛
如何夏日千雷怒

今作寒宵鳴咽流

春暮泛微水中流有作

微江春水綠於藍
兩岸花開雪滿巖
縱棹中流望山頂
晴雲如絮亂毵毵

微王廟

疊浪一灘翻積雪
連峯千里送青螺
微王建國猶來古
山鎖叢祠暝色多

無住墳山溪水

轉山溪溜碧涓涓
一勺芳甘信所便
蓋代偉人今卜宅
敬君還似老翁泉

自悼

永清江在房州及穀城界中
最為湍險渚水則又過之

銀山卷浪萬雷鳴
渚水諸灘險永清
平日垂堂猶自戒
年來輕作二江行

江行

南訛溽暑方流汗
北陸淒風已裂膚
江介寒暄真叵測
衿絺重繭在斯須

寄鄮里

長江依舊循荒壘零落遺民有幾家
莫伐城邊舊桃李
為憐曾發亂前花

遊道謙庵

中宵澍雨平明歇諸嶺晴陰各自分
偶來共就藜牀坐
時看前山出白雲

甲子初夏復開北戶

已向魏塘經四白又開北戶納涼颼
祇應長作牕中客

曾見蓬萊清淺時

西域以一年為一
白事見傳燈錄

競渡

吳俗春來鬪畫船
疾驅波上若飛煙
去春放逐曾觀此
伐鼓聲中又一年

立春偶題

昔年長恨春歸晚
及到春來又恐殘
今日推頽蕭寺裏
閉門一任歲將闌

新春

人生一世竟何哉老去萬緣如死灰愛惜分陰成底用
不如惡夢早醒來

次韻惜春

騷人競賦惜春詩為惜花飛萬點時唯有農家愛春盡
黃雲堆麥雪抽絲

有感

傾推漢祚是安昌祇恐狂瀾世莫當自古忠言寧盡用
老臣得不戒王章

李公

李公白髮已如絲肯惜忠言負主知事大不應回一語
知君不作上官儀

--	--	--	--	--	--	--	--

欽定四庫全書

紫微集卷十一

宋 張嶠 撰

詔

普安郡王辭免恩命不允詔

朕峻祠緡禮均福綿區況卿德重宗藩恭陪祀事爰增
圭而易鎮何抗奏以固辭宜亟欽承毋煩重請

孟郡王辭免恩命不允詔

朕考禮大報均伸洪釐慶衍端朝福膺綿宇況卿樞庭

舊弼戚畹賢姻載陪戶邑之多時乃典章之率寧煩封
奏固至遜辭趣祇厥承勿重有述

恩平郡王辭免恩命不允詔

朕躬郊拜貺薄海疏恩況卿行謹宗藩恪陪熙事因增
奮而更節奚固避以抗封亟欽其承勿重有請

詹大方辭免工部尚書不允詔

朕惟文昌發於六星而起部稽於九範欲熙成績乃任
舊人以卿操守剛方性資純厚頃自憲府擢長冬官今

從輔藩來造天闕俾續故職宜有前規其趣欽承寧俟
多遜

秦熹辭免恩命不允詔

朕法豫卦之建侯在於嚴祖考之祭歌崧高之於邑示
其徹土田之褒以卿顯德光明相祠恭恪茲均郊渥乃
率國章再攬奏封力陳避懇豈以謙亨之意至回渙號
之文其祇眷懷勿重有述

錢忱辭免恩命不允詔

朕拜貺明禋均厯綿宇既霈漏泉之澤固無反汗之文
況卿位亞公台賢稱戚畹疏恩近地為國彛章趣祇眷
意之承勿重奏封之請

王鈇辭免廣東經畧不允詔

朕惟嶺嶠百粵之區番禺一都之會慎擇良守欲安遠
民以卿智術疏通材猷強濟持甘泉之橐雅聞入告之
猷攬雲水之麾綽有去思之戀故茲謀帥無以易卿尚
奚需奏之騰固示撫謙之執趣祇定命往踐厥官

潘溫卿辭免承宣使不允詔

以卿戚畹自修習捐襦袴巖廊入侍任屬橐鞬比閱武
於便朝加精能於衛士乃眷訓齊之力爰陞留務之班
寧俟需章固形謙意茲為定命其趣欽承

孟忠厚辭免恩命不允詔

朕成禮於郊均釐及下矧在樞臣之舊宜先綸旨之褒
卿親賢並隆勲德兼著徙節旄於近鎮增食邑之多腴
時乃舊章毋煩固避所請宜不允

李顯忠辭免恩命不允詔

離壇竣事決寓敷恩矧卿榮膺帥旄職揔軍律茲屬神
休之惠有嘉武衛之勞公社疏封戶租敦食雖循曩典
亦示眷懷其趣欽承毋煩遜避

陳良傳乞在外宮觀不允詔

勅具官某省所上表辭免恩命事具悉爾獨不聞故國
世臣之說乎而來諗疾也夫保墳墓孰與成先王之美
休祠館職孰與圖累朝之報智者當有所擇矣式邁其

驅母事多遜所辭宜不允

制

吏部尚書制

文昌紀綱庶務而吏部冠於六官銓曹綜敘衆工而尚書典有四選位尊則責望愈重任大則稱塞為難矧衣冠流落之餘士多失職典籍散亡之後吏得肆欺伊欲選舉有方而無留滯之嗟法比可信而絕並緣之弊閔仁多士寤寐不忘顧設禁之已周必得人而乃又具官某

才用不匱得於歷試之餘趨操有常見於還觀之久持
身如公綽之不欲華國如子產之有辭德義足以格君
心之非議論足以補當世之闕翱翔兩禁已閱歲時屏
翰邦家稔聞績效屬天官之虛位乃越錄而用賢國以
得人士無異論夫以賢否混淆之際一裁以有司之文
科條猥衆之時率撓於猾吏之手唯清通則足以得法
之意唯公正則足以絕吏之姦勉追古人以稱朕命顧
予勞舊奚俟訓詞

禮部尚書制

國家有四方之患方務濟於多虞禮樂以百年而興敢
或隳於成業雖聲音數器之用既遭亂而僅存而制度
典章之文尚攸司之有守欲搜裒於遺闕稍振輯於多
儀顧中臺之總六卿均謂喉舌之任而春官之兼二事
寔叅禮樂之司必得其人以若予采具官某稟資肅毅
殖學深醇閱理既多所見者大出長藩輔政事宜於民
人入扈禁嚴謀猷備於獻納更踐之久譽處之休稔於

予聞允於衆論將以承天心而建事是用度功次而用
賢昔隨武子脩執秩以為晉法於周襄板蕩之餘叔孫
通以綿絕而具漢儀當嬴秦湮沒之後雖彌文之或愧
猶後世之有傳矧國舊章具存故事稍加被飾遂底熙
明在汝勉之以稱朕命

李成為固守蒲城勞效轉五官內兩官授忠州
防禦使制

強敵不道背干齊盟關陝衆城頗為敵屈若其嬰壘自

保守義不侵自非知臣子之大戒明逆順之遠圖其孰能之當極優隆風示遠邇具官某奮由行伍克蹈忠義慕古節士志徇國家眷蒲城之在郊如黑子之著面而率衆入保卒能抗敵忠壯之烈遂震一方毀義之人懾讐自恨覽觀功狀嘉嘆良深武列重階捍防重任併為顯賞以示優隆仍假郡符兼副戎律益堅義槩用答殊榮

劉寶許世安王升並除正任防禦使制

勅具官某懷許國之忠驍雄自命厲殺敵之果敏銳無
前茲因王旅之脩封遂奮兵威而壓難載嘉武節俾進
列於捍防益茂壯圖尚畢精於報稱夙宵自勵毋廢前
勞可

許青為與烏珠接戰能奮不顧死賈勇先登奇
功顯著衆所信服特於止法上兩轉遥郡防禦
使制

勅具官某奮身以徇國家之急雖資主將之謀剡手以

衝仇人之胃實賴摧鋒之勇申攷褒命以獎尤功以爾
果毅無前技能絕衆久將屯而衛塞積戰伐以知名不
介而馳敵人望風皆靡橫戈而斫壁壘終夜有聲再觀
獻狀之來允謂軍威之冠俾以武階之峻遙分捍禦之
崇祇服異恩更圖顯績可

正任承宣觀察防禦團練刺史制

朕惟大河之表函谷以西罹敵禍者十年隔王靈於萬
里雖連城跨邑竝劫於威強而服然忠臣義士何嘗不

謳吟以思逮其天有還形之初人謀咸贊之日果奮義
烈以成尤功可無褒優用勸忠力具官某戰鬪本於習
俗忠孝殆其天資知勇有聞剛毅不屈久連節俠欲合
黨而亡秦遂奮壯猷終得當以報漢顧立義以若此豈
書勞而可稽俾正任於居留兼典司於營衛祇服榮施
益厲遠圖觀察改云俾正任於廉車兼訓齊於禁旅防
禦改云俾正任於捍防兼庇官於循徽團練
改捍防為兵團刺
史改兵團為虎符

趙不棄工部侍郎制

文昌之總衆務職重六官起部之若予工法稽九軌貳
卿同於率屬事任艱於擇人具官某風力敏彊器資宏
博振外臺之譽將漕計於大江之東以列卿之權覈軍
儲於四川之遠嘉廼績用簡于朕知方敦趣以還朝亟
疇咨而疏寵通內戚大宗寺之籍時謂懿親列司平少
常伯之聯亦當重責有獻納論思之益有繕營制作之
勤惟暨乃僚往欽汝守

盖成授承信郎制

朕賞恐踰時付便宜於帥閫功圖實效嚴考覈於吏銓
茲命為真往勤圖報可特授承信郎

觀文殿大學士張浚故祖佐可特追封嘉國公

制

勅朕穆卜休辰嚴禋帝考神況允答百順畢臻思與寰
區同茲祉福惟吾舊德功在王家揆厥所元可無追責
具官某故祖某孝悌著於宗族仁惠行於里閭才足以
自致而命不融德足以有施故後宜大再世之慶實為

相臣頃以刻章既極師垣之寵今茲告第遂開公社之榮知氣不忘尚歆休渥可

故祖母趙氏可特贈越國夫人制

勅朕致力於神既以格三靈之休移福於下又以及四海之遠惟時追賁已推及祖之恩逮其室家可後從夫之寵具官某故祖母某氏孝恭之行不懈於春秋慈祥之風甚宜於閨閭積累豐厚流光自長至於聞孫碩大休顯脂澤有奉既賜履於三吳湯沐增奮更徙封於百

越尚歆貴寵以慰幽局可

故祖母王氏可特贈陳國夫人制

出於良奧來嬪令族事舅姑有色養之孝訓諸子有義
方之益約素自處詒厥後人再世而昌遂相天下小君
正位已荒畢萬之山川大國徙封更昨故公之土略春
秋時祀尚侈褒榮可

故父咸可特追封慶國公制

勅朕肇裡重屋大祀休成推上帝之仁既錫福於四海

廣教孝之義以加惠於庶功使顯揚者獲報親之心追
遠者慰濡露之感若元功舊德之先不被於恤章則輝
胞翟闡之賤何有於祭澤具官某故父某德足以及物
何不逮於生民文足以行遠而不施於廊廟徒擢賢科
於異等莫蜚英聲於士林雖無一時之遭遂蓄百年之
慶至其嗣子為吾相臣曩以維垣之崇啟茲公社之貴
其因惠術胙以大邦歆承光榮慰彼厚夜可

故前母任氏可特贈潭國夫人制

勅朕惟祭澤之行既下均於胞翟褒崇之典固無間於
顯幽本原內助之賢宜沛從夫之寵具官某故前母某
氏被服女戒飭修婦儀雍睦以宜家入柔正以事夫子
深蓄餘慶以施後昆既正位於小君益衍封於大國光
塵如在歆我榮恩可

故前母趙氏可特贈楚國夫人制

供蘋藻之薦而有季蘭之欽應彤管之時而鍾靜女之
美遂相夫子克成其家垂裕後人用襲其慶既正小君

之稱號益荒大國之封圻閭則未遥尚知歌賁可

母計氏可特封鎮國夫人制

勅朕惟熙事慶成均釐寓縣推體羣臣之義莫大於褒
親念為人子之榮孰如於將母矧乃致位將相勒功鼎彝
入則趣養堂以奉甘旨出則奉安輿而窮逸樂歷觀今
古光耀鮮并宜攷書命之榮以侈廟澤之廣具官某母
某氏出於望族來嬪大家靜專柔順以肅其閭彛端毅
方嚴以成其母道容潤之美竝茂於山河禮法之嚴兼

資於鍾郝吉祥善事舉集令門象服魚軒既正小君之位脂田湯沐益荒大國之封欽承明綸永綏壽嘏可

故妻樂氏可特贈冀國夫人制

勅朕並賴庶工之力以共濟國家本原內助之賢而誕施褒渥漏泉之澤何間顯幽具官某故妻某氏植德之美宜膺壽寵賦命不永遽即幽宅俯仰歲時墓木未拱可無隱飾以慰營魂徙封大邦益昭顧恤尚其有識克嘉賴之可

妻宇文氏可特封益國夫人制

勅朕褒寵舊德務極優隆矧廟澤畢逮於翟閤福嘏可
遺於家室其施恩渥以賁柔徽具官某妻某氏族屬之
華門閭之盛容德之茂組紉之修而奉姑嫜惟孝謹之
恭事夫子有勸勉之義輯此令善宜服寵榮湯沐啟封
已徹淇澳之境土筭瑯增耀再荒蜀道之封圻益相所
夫欽承勿替可

欽定四庫全書

紫微集卷十二

宋 張嶠 撰

制

盖城轉保義郎制

爾戮力從軍宣勞勵衆兩受權宜之令一頒寵錫之恩
銓次功能敘陞階品往祇異數益勵壯圖可保義郎

勾龍如淵元是御史中丞為因施庭臣語言狂
率不即彈劾奉聖旨罷御史中丞今遇明堂大

禮赦合檢舉復數文閣待制制

朕稱裡合宮肆眚象魏開棄咎之路以一洒於庶尤閔
負罪之臣宜稍還於故秩矧乃甘泉之舊嘗詒刑史之
書其霈恩榮以除苛統具官某材資畢給學問深明早
振譽於時流遂升華於法從西垣烏府兩所踐揚風采
文辭具存稱績一詒吏議驟閱歲時茲舉彛章俾還次
對廣仁恩之意朕方厚於臣工復玷缺之艱爾毋忘於
飭厲

員延年為金人侵犯懷德軍陷沒特贈朝請大夫換給制

爾頃以城陷捐軀既加恤典其攷申命用賁幽宅尚其有知歆承褒錄可

雷仲宋福為殺退金人各轉一官制

間者敵兵匪茹王旅鏖兵既以勝歸書勞可後具官某發迹萬人之衆收功百戰之餘雄勇雖其土風忠赤殆其天性方鄆城之合戰命將帥以濟師寔為先登勇冠

士卒既至質而不爽復係獲以居多揚威而歷子陽之城良嘉武節堅壁而觀鉅鹿之戰獨不愧心進陟武階用示勸獎尚圖顯績以報恩榮

逮選潘林袁班張天民楊詒戴道陳叡張寶劉公卞祝居黃溫王恭為勅令所編修在京通用條冊成書係本所供檢文字等各轉一官制

勅朕惟中都庶府總統非一不有法令何以為治設官置局俾定章程爾等隸職其間皆讐有勞因其成書遷

秩示寵尚思勉哉可

周三畏為勅令所編修在京通用條冊成書轉

一官制

勅朕惟中都之治以法令為先國家科條品式具在攸
司兵火以來淆亂不理肆加緒正以示四方爾以仁恕
篤厚為吾法卿詳練通明定吾令甲參以故寔舊章之
善去其他請奇比之繁成書粲然足開後嗣俾遷秩序
用獎勞能勉祇恩榮尚膺褒陟可

陳橐為勅令所編修條冊成書轉一官制

朕制法議令嘗資緒正之能懋賞勸功可後褒陞之典具官某操履端靖學術淵深敏於文辭兼通吏道朕以衆大之地治亂所原總統之方教條是賴雖故寔舊章之猶在而他請奇比之已繁患其猥并俾加刊定逮成書之來上嘉分部之可觀秩以官榮酬其勞勩勿曰敘進而急欽承可

尚惟賢為勅令所編修條冊成書係本所供檢

文字轉一官制

勅朕惟中都庶府總統非一不有法令何以為治設官置局俾定章程爾以公府掾謹飭無害有職競為因其奏篇遷秩示寵尚思勉哉可

孫近為同提舉勅令所編修條冊成書轉一官制

勅朕惟展義而巡方岳即所幸以為京師雖化民成俗之方莫先仁義之統然御衆經邦之要亦資法令之修

乃飭司存俾加定著逮奏篇之來上觀治具之昭陳載
惟參領之臣可後褒優之典具官某負復變知貫之學
而行之以敏蘊尊主庇民之業而濟之以和深厚之文
足以發揮號令練達之識足以裨贊緝熙方睠上都寔
觀萬國當平定之日品式具存遭兵亂之餘文籍幾盡
是欲小紀大綱之備設以為百司庶府之章程俾參前
後之請書約以祖宗之故寔輯成摯令以付攸司總裁
專委於相臣科指更資於近輔既成書之進御嘉立制

之可稽宜寵錫於綸言俾增崇於秩序以隆體貌以重
恩榮噫示四方禮俗之中雖遠師於商德立三輔尤異
之法亦雜用於漢條其共守於成規以克臻於至治可
徐寵楊申陳廷圭焦義為掩捕海賊生擒賊首
卓全高等徐寵轉兩官資楊申陳廷圭焦義各
轉一官制

乃者盜發海濱里閭廢亂將吏撲討遂有成勞爾等佐
其發興協心戮力用能無乏皆讐有功第服恩榮以示

勸獎往祇明命益懋乃心

蔣元高師說潘褒劉玘張諒賀允丁成王喜張
珊萬超王仇楊皋黃壽馬信費景李倩為敵人
侵犯順昌竝係在城守禦者各轉一官資制

屬者敵人連侵汝陰不有戰者孰過兵鋒不有居者孰
與共守雖勞烈之有間豈勸賞之可遺各進一階用酬
戮力服我休命毋替忠勤

林覺祥為應募戰船防秋轉一官資制

朕比勅負海之郡營舟楫之事爾能應募忠慨可嘉進
秩示恩以為衆勸

裴鐸為殺獲賊首盧成生擒龔利勝等轉一官
制

屬者羣盜就降復肆攻剽爾能用命首殲兇渠芽孽既
除閭里安妥進官一列祇服恩榮

孫泉等為權壽春府鄭綱奏亳州使臣顏林齎
到番人歸德府路招諭使誘脅文字要本府投

拜本府衆官等同心一意不肯順番死守府城
其立功人武翼大夫孫泉等乞推恩奉聖旨竝
與轉一官制

勅具官某向者強寇傳檄壽春爾等守義一心有死無
二忠壯之節宜用褒勸進官一列以示恩榮尚皆勉之
益圖稱效可

劉洸為隨張浚至關陝普轉一官制

頃者大臣宣慰關陝爾實從行例進一階以酬其道路

之勤往服恩榮母墮乃力

張明為捉殺虔賊劉宣轉一官更減一年磨勘
盧璿為捉殺虔賊增吉垣九轉一官制

勅爾頃捕賊有功應賞其祇明命以服恩榮可

方與為捉獲兇惡海賊吳宥一等十四人全火
并婦女六人連賊仗等物轉一官制

勅爾職求盜捕獲兇渠俾進官階用為獎勸可

周林陳抃石延慶方雲翼為勅令所編修在京

通用條冊成書各轉一官制

勅朕惟京師物衆地大四民雜居百司庶府總治非一
祖宗法令備具內作章程外示方夏垂統之懿超軼百
王兵火以來頗或散落加以他請竒比皆益猥衆吏得
以並緣下無以考信曩詔更定將以近古而便民爾等
咸以傑異之材職司刊刻成書來上整理可觀俾陞秩
序以示勸獎益率乃事無廢前勞可

李海為禦敵人得功并該喝轉暴露特轉七資

及解圍方出原授一資因隨薛仁輔等遠赴行
在寄兩資共寄一十一資每資合比折減三年
磨勘依例每滿五年轉一官制

勅爾頃以軍候屢立戰功驟陞武階益思奮厲可

劉光遠為金人逼近順昌府奮不辭難協贊軍
務提舉四壁別無疎虞橫行上轉一官制

勅夫兵戈鋒刃之地人所委之而去者也非忠壯義烈
以報國為意而無苟免之慮烏能同舟共濟而無二心

也哉具官某出自將門早登勇爵護邊積久戰伐知名
間者徑順昌適與敵遇能與共守立義可嘉若古有言
無德不報其班名命益進橫階是為異恩尚圖稱效可
劉訥劉釗王義賓安世用馬綬王侁為措置捍
禦金人有功並各轉一官制

勅具官某等間者順昌被寇城守之勞爾亦預焉稍以
敘陞用示勸獎尚思勉哉可

張忠順換給敦武郎更轉一官制

爾淪陷既久惓然改圖嘉其反正之忠俾與武階之列
益思厲勉以報國恩

韓海為生擒賊首王念一等千里招復歸業江
西安撫大使司保明申與轉一官制

勅具官某大江以西羣盜蟻結爾能討捕間里為安寵
進官階尚思勵勉可

薛綸為差往沁黃河探報金人動息與轉一官
制

勅爾頃為國覘敵勞能自著申加褒命益務忠勤可

梁吉等為與烏珠接戰獲捷各轉一官制

勅向者大將鏖戰鄆城爾等實豫戎行皆克致命譬如
捕鹿或角其前或掎其側用能使敵人之強不得逞志
於我宜頒顯賞以酬爾庸益圖尤功嗣有褒陟可

程詵為先因殺獲虔賊劉宣等轉一官制

勅爾頃以捕賊有功應賞祇承明命毋替爾勤可

李政等權太康縣與縣尉巡檢作劉錡鄉道掩

殺金人捷各與轉一官制

勅太康之役爾等實導吾軍以克有勝不可以莫之酬也各服官榮無怠爾力可

方喜遠來歸正特與轉一官制

爾淪陷異域不忘秦聲反自敵中能以情告嘉其忠諒秩以官榮益懋爾為尚圖稱塞

孫撫手詔順昌府官吏軍民等敵兵犯境王師拒衝惟爾吏民協濟軍事保扞城壘驅遏寇攘

眷乃忠勤宜加撫惠數內官員在城守禦者竝與轉一官右文林郎沈丘知縣與轉一官制

勅間者強敵侵敗王畧向非壯者奮其勇敏者供其事何以有成功哉有司按狀爾預有勞其施官榮以示勸獎尚思勉之可

王照提舉淮東措置料角斥堠王安道申統領官張宗王照一般在料角防托委寔宣力檢照張宗已轉官特令王照一例推賞奉聖旨與轉

一官於正名目上收使制

疆場之司所以備豫不虞之患固莫先於候望而爾能致力於斯焉俾進武階以勞勤恪益修乃職毋懈於前

楊宏劉錡奏金人攻打順昌府將士背城血戰敵敗委獲大捷吏部勘會本官先立奇功於武節大夫上轉左武大夫今來合轉兩官係礙止法奉旨令與橫行上轉行一官其一官礙止法人依條回授制

勅勝敵與戰既宣徇國之勞行爵以功豈限彛章之等
具官某忠在王室志殲敵人顧蓄憤之有年果申威於
一舉既寵陞於橫列且流貤於本宗祇服異恩益圖顯
績

張溫同楊宏劉錡奏金人轉官回授制

勅爾以驍雄自奮忠徇國家遇寇淮濱居多疾力朕審
賞以戰雖每厚於圖功然名不假人固難越於彛典其
考稽於故寔俾貤爵於本宗益茂爾圖嗣膺褒陟可

焦義為捕獲到海上劫賊鍾十三等八名委有
功效轉一官於正名目上收復制

勅爾捕獲兇盜有功中率有司按狀俾服官榮益勵遠
圖以思報効可

陳元裴鐸胡昭為討捕李朝賊盡靜各轉一官
內胡昭係文臣選人比類施行制

潢池弄兵久而未殄討捕既靖勸賞斯行往服恩榮益
思所稱

張宗廣為捕獲姜貴一十四人謀叛轉一官換給制

勅爾頃迹捕姦宄進官一列申錫書命以為爾崇尚勉之哉毋忘勤力可

王良存朱節為隨岳飛應辦錢糧有勞效各轉一官內王良存除直徽猷閣朱節為係參謀官措置殺敵馬有勞制

勅具官某古人嘗怪持文墨議論者與戰功同賞而不

知行軍用師之道必賴政事謀獲之助然後能有濟也
爾等或董將輸於漕輓師不乏興或參機畧於中權慮
無遺策并與其佐皆讐有功竝寵秩於階資用褒優於
績效益思勵勉無廢前勞

田貴等先因程待制依分鎮便且指揮將前項
功賞與轉官并同職昨隨殿前太尉勦殺劉猊
立到奇功特與轉行遙郡一官制

勅爾積戰伐之功既高武爵矣茲又以舊勞自言雖版

授官階出於一切之政然賞疑從予始遵寧僭之言用
稍越於彛章俾遙分於團結尚多好爵以俟尤功益茂
爾圖嗣膺褒陟可

劉文昇為劉錡申發機速文字遣發官兵奏捷
幹事竝專委本官承接捍幹辦及解發俘獲番
賊之類亦只是本官獨力應辦委是別無不了

奉聖旨轉兩官制

爾以刀筆從事兵間方邊境之始騷正羽書之沓至服

勤夙夜以辦治聞進秩二階用酬勞勩益思盡瘁以稱
茂恩

杜亨道為係干預機速軍務等宣力尤多轉兩
官制

朕推轂將帥以宣閫外之威籌策兵機蓋仗幙中之畫
爾奮由儒士有志功名出從元戎預聞密議淮瀆之勝
盖有助焉併錫二階以為爾寵祇服恩命益勵良圖

郝義等一十人為收復商虢等州竝名各與轉

兩官制

勅某等迺者第功行賞以勞戰士宜若無遺而大將繼
言爾等未被甄獎用攷贊命俾服官榮益勵壯心以圖
稱塞可

鞏滌岳飛申契勘掩殺金人收復州縣累獲勝
捷今將隨軍轉運使官屬應副錢糧官欲轉兩
官奉旨竝依制

勅向遣大帥出脩封疆饋餉不乏爾寔有司焉可無恩

獎以報勞勤祇服官榮益茂乃職可

李寶係義兵統制將帶京東忠義兵馬與金人
鬪敵同逐人老小轉清河前來歸投本朝與轉
兩官仍除遙郡刺史制

勅朝廷崇尚武勇所以勵三軍之心褒表忠義所以為
四海之勸況於二者寔所兼資以爾糾率義旅出入兩
河式遏寇鋒間關百戰自拔歸國忠壯可旌俾亟進於
武階且遙分於符竹尚俟可為之會更立昭明之功立

勵爾心毋墜乃力可

何皋同前與轉四官兼閤門宣贊舍人制

勅具官某審賞則可戰既垂封爵之科飲至而策勲可
後書勞之典其敷明命以答尤功以爾懷許國之忠驍
雄自命勵殺敵之果敏銳無前茲因王旅之脩封遂奮
兵威而壓難俾驟陞於武爵且贊謁於帝宸祇服寵榮
尚圖稱塞可

韓之美係湖北京西宣撫司幹辦公事累與烏

珠等見大陣獲捷轉右朝議大夫依前直秘閣

制

勅爾贊畫大將遏寇有庸既疇爾勞以行賞典載稽故事更錫命書特越錄於彝章俾進秩於少列上還故印往服新褒深惟絕異之施無效衆人之報可

焦文通等五人為殺敗金人出等奇功各轉武功大夫除遙郡刺史制

審賞則可戰既垂封爵之科飲至而策勲可後書勞之

典其數明命以答尤功爾等戰伐有聲伎能絕衆奮身
以徇國家之急本其素心剡手以衝仇人之胷義無反
顧比敵師之犯境臨淮浦以鏖兵既成一戰之功遂振
三軍之氣及觀獻狀宜錫贊書用驟進於武階兼遙分
於郡寄朕惟愛惜襦袴之意每憂名器之輕推饒爵邑
之心何悵忠勞之勸往祇殊寵益勵壯圖

劉廣為殺敗金人出等奇功轉武功大夫除遙
郡團練使制

爾志狗國家功高閭閻稟資壯烈衆許摧鋒捷志驍雄
能推陷陳比敵師之犯境臨淮浦以鏖兵既成一戰之
功遂振三軍之氣及觀獻狀宜錫贊書進陞武列之崇
兼領兵團之寄

宋謹同前與轉行右武大夫遙郡刺史制

具官某懷許國之忠驍雄自命勵殺敵之果敏銳無前
茲因王旅之脩封遂奮兵威而壓難越於常典俾驟列
於橫班酬其餘勞且遥分符竹夙宵自勵毋廢前勞

可

柳倪為金人攻圍順昌府城係提舉四壁射殺
敵兵甚衆兼自中箭畧不退避委是忠勇轉行
右武大夫制

勅具官某拳勇自將漫高武爵屬者順昌之役有義城
守之勞若古有言無德不報其班名命益進橫階是為
異恩尚圖稱效可

程師回收捕廣賊及提舉脩緝虔州城壁勞績

特與轉行右武大夫制

勅扞城殄寇既宣許國之忠行賞報功豈限纓章之等
具官某秉資驍果久歷戎行積伐宏多宜膺異獎其申
敘於名命俾進陟於橫班是為茂恩益思顯報可

員青為保護劉聖七殿神御并殺獲羣寇偽大
王等有勞正補敦武郎閤門祇候又幹當年終
轉武翼郎又訓閱不易賞轉武經郎又與金人
見陣軍前喝暴露轉武功郎該磨勘轉武經大

夫又該磨勘曾立戰功貼轉武畧大夫依舊閤門祇候換給制

勅爾以積勞漫高武爵有司按法具以狀聞申錫命書用昭寵獎往祇明命毋廢前勞可

劉光為擒獲契丹千戶耶律溫等轉一官合武畧大夫兼闔門宣贊舍人制

勅爾轉戰用命俘獲有勞載稽厥庸宜加褒陟武階益竣祇服明命可

趙雲李寶各轉左武大夫樊貴李儀劉深各轉
拱衛大夫秦祐除遙郡刺史並係掩殺金人立

功制

勅朕記人之功嘗思於厚報故賞國之典無避於過優
宜錫命書申褒虎士具官某固吾之圉既久積於功伐
退敵於陳比更立於戰多既茂恩光俾正班於橫列載
稽典故宜辭職與帝宸復進一階併章異數祇服休命
益勵遠圖可

侯信為河北劫破金人大寨等忠義奮發果立奇功特轉武義大夫遙郡刺史制

勅爾忠勇自奮絕河津而北直抵敵營撓亂其衆載觀獻狀深嘉爾勞進陟武階遙分符竹欽承恩命更立尤功可

李成為結集同華一帶鄉村土豪保險抗敵屢立功效備見忠義特轉行履正大夫遙郡觀察使節制同華等處忠義軍馬制

勅朕捐爵賞以任天下武勇審計慮以復前人土疆其
有果毅奮庸忠誠徇國堅守要害之地支抗強敵之鋒
立義足嘉褒榮可後具官某稟山西之壯烈習塞下之
風聲沉雄犯難而不回功業遇時而自見阨山川之固
既盡保於遺民收戰伐之多遂益增於士氣橫階廉察
併獎爾勞批難折衝更揚我武祇承明命勿怠遠圖

